

# Cart Egwchope De'en Bzoj San Bedən'

**Bedən' chzoje' cart par beṇə'  
ca' chso'onlilažə' Cristən'**

**1** Nada' Simon Bed naca' apostol na' beṇə' güen žin che Jesocristən'. Na' chzoja' le'e bagoclen Diozən' par chonlilažə'əle Jesocristən'. Jesocristən' naque' Dioz chechon' ben' babebej chio'o xni'a de'e malən'. Tozə can' chone' güen len yoguə' chio'o chonlilažə'əchone' chedə' la' zdacze' licha, tozə can' chone' len neto' naquəto' apostol na' len le'e cui nacle apostol. <sup>2</sup>Chṇaba' lao Diozən' gaquəlenche' le'e na' gone' ca so cuezəchle binlo len xbab de'en yo'o lo'o yichjla'ažda'olen' laogüe de'en nombi'alene' na' de'en nombi'ale Xancho Jeso'osən'.

**Can' cheyaḷə' gon chio'o  
chonlilažə'əcho Cristən'**

<sup>3</sup>Banombi'acho Xancho Jeso'osən' na' de'e na'anə' lao yelə' guac xen che'enə' babene' chio'o yoguə' de'en chyažjecho par sotezə socho goncho can' chene'e Diozən' na' güe'ela'ochone'. Xancho Jeso'osən' bagwleje' chio'o par naccho xi'ine' laogüe de'en naque' le'ezelaogüe beṇə' zaque'e na' nape' yelə' guac

xen. <sup>4</sup>Na' laogüe de'en naque' le'ezelaogüe beṇə' zaque'e na' nape' yelə' guac xen, babene' lyebe gone' de'e zan de'e güen juisy na' de'e zaque'e len chio'o. Bene' lyebe gone' güen len chio'o par niç ca' gaquə yichjla'ažda'ochonə' cayanə'ən naquə yichjla'ažda'ogüe'enə', na' par niç cuich goncho de'e mal can' chso'on beṇə' ca' cui zjənombia' Diozən' con choso'ozenagteze' che de'en chesə'əzelažə' la'ažda'omalga'aque'enə'.

<sup>5</sup>Bachonlilažə'əcho Xancho Jeso'osən', na' de'en bachzolao chac yichjla'ažda'ochon' can' naquə yichjla'aždaogüe'enə' cheyaḷə' goncho xte ga zelao saquə'əcho par niç sotezə socho goncho de'e güen na' par niç šejni'ichecho de'en chazlažə'enə'. <sup>6</sup>Na' bito cheyaḷə' güe'echo latjə ṇabia' la'ažda'omalchon' chio'o. Cheyaḷə' sotezə socho gonlilažə'əcho Diozən' catə' chy' chzaquə'əcho, na' cheyaḷə' güe'ela'ochone' na' goncho can' chene'ene'enə'. <sup>7</sup>Na' leczə cheyaḷə' gaquecho che beṇə' ljuəžjcho beṇə' chso'onlilažə' Cristən' can' chonlilažə'əchone' na' cheyaḷə' gaquecho che yeziquə'əchlə beṇə'.

<sup>8</sup>Šə zdacho chonchguacho yoguə' de'e ca', chaclenən chio'o par niç ñezecho can' chene'e Xancho Jesocristən' goncho na' par niç sotezə socho goncho can' chene'ene'.

<sup>9</sup>Pero na' notə'ətezcho šə bito choncho de'e ca' bagwnia' cheyałə' goncho, nçhol yichjla'ažda'ochon' na' bito chejni'lišaogüe'echo çe Diozən' na' bagonlažə'açho de que Diozən' babnitlaogüe' de'e mal de'en babencho antslə. <sup>10</sup>De'e na'anə' beñə' bišə', cheyałə' goncho yoguə'əloł can' bagwnia' chene'ene' par niç ənezecho de'e li bagwlej Diozən' chio'o par naccho xi'ine', na' bsi'e xņezenə' antslə par niç gwcue'e chio'o ca xi'ine'. Šə can' goncho cuat cuiayil'icho. <sup>11</sup>Nachən' bitobi bi de de'e gaquə əgwžonən žjəyecho len Xancho Jesocristən' gan' chnabi'e zejlicane, Jesocrist ben' babebej chio'o xni'a de'e malən'.

<sup>12</sup>Na' la'anə'əczə banezele de'e ca' bagwnia' le'e na' bazole çeçh çejele'ele dižə' li çe Diozən', bia'aczə che'enda' gontezə gona' par niç žjəyecha'alažə'əlen. <sup>13</sup>Chacda' naquən güen na'a nembana' gona' par niç žjəyecha'alažə'əle de'e ca' na' gonle xbab çege'aquən. <sup>14</sup>Nezda' de que yob əžin ža gata' segon can' bablo'i Xancho Jesocristən' nada'. <sup>15</sup>De'e na'anə' chona' xte ga zelao saquə'əda' par niç catə' bagota' guaquə yosa'alažə'əle de'e ca' bagwnia' cheyałə' goncho.

**Apostol ca' besə'əle'ine' yełə'  
chey che'eni' çe Jesocristən'**

<sup>16</sup>De'en babzejni'ito' le'e can' əgwlo'i Jesocristən' yełə' guac xen

çe'enə' catə'an yide' de'e yoblə, bito naquən de'e chaljlažə'əto' par əxoayagto' le'e. Neto' apostol çe'enə' ble'ito' yełə' chey che'eni' çe'enə' na' de'e na'anə' ñezetə' de que naque' le'ezelaogüe beñə' zaque'e. <sup>17</sup>Xacho Diozən' bnežjue' Xi'ine'en yełə' bala'an xen na' bene' par niç cho'alaogüe'enə' goquən ca de'en chey che'eni'. Na' Xacho Diozən' ben' naquə le'ezelaogüe beñə' blao na' ben' chnabia' doxenlə, gwne' çe': "Bengan' Xi'ina' ben' chacchgüeida' çei, na' cheba chezaquə'əlažə'a len le'." <sup>18</sup>Na' neto' beneto' can' gwna Diozən' çe', Dioz ben' zo yoban', la' gwzoto' len Jesocristən' lao ya'anə' de'en gwlej Diozən' par goc ca' laogüeinə'.

<sup>19</sup>Na' de'en bable'ito' yełə' chey che'eni' çe Jesocristən' blo'ichən neto' de que Xtizə'enə' de'en bosə'ozoj de'e profet ca' beñə' ca' gwso'e xtižə' Diozən' cana' naquən de'e li. Na' de'e güennə' gonle šə əgwzenagle çei. Xtižə' Diozən' de'en nyojən chse'eni'in lo'o yichjla'ažda'ochon' can' chon to lampara chse'eni'in to lo'o cuart gan' naquə žçhol. Na' de'en nyojən əgwse'eni'in lo'o yichjla'ažda'ochon' yedote xte catə'an əžin žan' yidə Cristən' de'e yoblə. <sup>20</sup>Pero na' de'en naquə de'e žialao šejni'icho, de'e profet ca' beñə' ca' bosə'ozoj Xtizə' Diozən' cana' bito bosə'ozoje' con xbab çege'acze' çe bi de'e ca' bachac o çe de'e ze'e gaquə. <sup>21</sup>De'en bosə'ozoje' bito nacho naquən to de'e gwan yosə'ozoje', sino de'en gwlej Diozən' lega'aque' par gwsa'aque' lažə' ne'enə, Spirit

che'enə' benən par niç boso'ozoje'  
de'en gone'ene'.

**Benə' ca' choso'osed choso'olo'i  
xtižə' Diozən' clelə**

**2** Na' tyemp catə'an gwnitə'  
profet ca' leczə cana' gwnitə'  
profet güenlažə' entr beṇə' Izrael  
ca'. Na' ca'aczən' nitə' beṇə'  
yoso'osed yoso'olo'i xtižə' Diozən'  
clelə entr le'e. Lega'aque' se'enene'  
yesə'əxoayague' le'e par niç cui  
gacbe'ile de que de'en choso'osed  
choso'olo'ine' bito naquən de'e li.  
Na' lega'aque' yesə'əzoe' Xancho  
Jesocristən' ca'alə ben' gwdixjw  
xtolə' chio'o beṇəch. Na' šə no  
yoso'ozenag che de'en choso'osed  
choso'olo'i beṇə' goxoayag ca',  
žjəya'aque' lao yi' gabilən'. Na'  
ca de'en so'on beṇə' goxoayag  
ca' gonən par niç leczə əžin ža  
catə' lega'aque' yesə'əbiayi'e to de  
repentzə. <sup>2</sup>Beṇə' zan yoso'ozenague'  
chega'aque' na' so'one' yoguə' claste  
yelə' zto' ca de'en chso'on beṇə'  
ca'. Na' por ni che de'en so'one',  
beṇə' ca' cuinə' so'ombia' Diozən'  
yesə'əne' contr dižə' li che Diozən'  
de'en naocho. <sup>3</sup>Na' beṇə' goxoayag  
ca' laogüe de'en se'enchgüeine'  
yesə'əzi'e mech əso'e de'e zan dižə'  
güenlažə' de'en sa'aljlaže'e parzə  
niç əgwnežjoga'aclene' xmechlen'.  
Dezd cana' Diozən' babži'e bia'  
yesə'əzi'e castigw, na' naquən segor  
yesə'əbiayi'e.

<sup>4</sup>Nezecho can' goquə cana'.  
Diozən' bnežjue' castigw che angl  
ca' gwsə'on de'e malən' bsele'e  
lega'aque' lo'o yech gabil gan'  
lechgualē naquə žchol, na' na'  
zžənite'e xte ca əžin ža yesə'əzi'e

castigw zejlicane. <sup>5</sup>Na' leczə ca'  
Diozən' bžiayi'e yoguə'əte beṇə'  
ca' cui gwsə'elao' le' cana' catə'an  
bsele'e yejw sio' juisyən'. De'e  
na'anə' gwsə'ate' gwse'eje' nisən'.  
Pero na' Diozən' bosle' Noe ben'  
gwdixjue'i beṇə' ca' nac so'one'  
par niç Diozən' əne' zžənaque'  
beṇə' güen laogüe'enə', na' leczə  
bosla Diozən' yegažə beṇə' yoblə.  
<sup>6</sup>Na' leczə bžiayi'e beṇə' ca'  
gwža' syoda Sodomān' na' syoda  
Gomorran', bene' par niç syoda  
ca' gwse'eyən besyə'nitteczən.  
Na' bene' ca' len syoda ca' par  
chosnisene' yoguə' beṇə' ze'e  
za'ac beṇə' cui so'elao' le' de que  
gwnežjue' castigw chega'aque'. <sup>7</sup>Na'  
catə' Diozən' bnežjue' castigw che  
beṇə' Sodoma na' beṇə' Gomorra  
ca', bosle' ben' le Lot chedə' Lotən'  
goque' beṇə' güen laogüe'enə',  
na' Lotən' goquene' pesad ca yelə'  
zton' gwsə'on beṇə' mal ca'. <sup>8</sup>La'  
beṇə' güen na'anə' gwzoe' entr  
beṇə' mal ca', na' yoguə'əte ža  
ble'ine' na' benene' de'e malən'  
gwsə'one' na' goquene'en pesad lo'o  
yichjla'ažda'ogüe'enə'. <sup>9</sup>Na' yoguə'  
de'e ca' de'en ben Diozən' cana'  
chzejni'in chio'o cho'ela'ochone'  
de que Diozən' nezczene' nac gone'  
par yebeje' chio'o lao bitə'ətezə  
de'e gonən ca əxorcho goncho  
de'e malən'. Na' leczə chzejni'in  
chio'o de que chone' par niç beṇə'  
mal ca' chesə'əzi'e castigw ṇa'a  
na' əžin žan' gwnežjue' castigw  
chega'aque'enə' zejlicane.

<sup>10</sup>Na' gonchgüe' castigw che  
yoguə' beṇə' ca' chso'onzeche'  
yelə' zto' chega'aque' con can'  
na la'ažda'omalga'aque'enə', na'

bitobi respet chsa'ape' Xancho Diozən'. Bitō chesə'əžebe' par so'one' de'e malən'. Chso'one' con can' chse'enene', na' choso'ožia choso'onite'e angl ca'. <sup>11</sup>Na' la'anə'əczə angl ca' zjənapəche' yelə' guac na' zjənaquəche' beṇə' gual cle ca beṇə' ca' choso'osed choso'olo'i dižə' güenlažə', bito chəsyə'əyaxje angl ca' yoso'ožia yoso'onite'e beṇə' güenlažə' ca' lao Xanchon'.

<sup>12</sup>Pero beṇə' ca' choso'osed choso'olo'i dižə' güenlažə'ənə' choso'ožia choso'onite'e de'e ca' cui chse'ejni'line'. Yesə'əbiayi'e chedə' zjənaque' ca bia yixə' de'en chso'one' con can' nan chęga'aque' na' bito choso'ozenague' che Diozən'. <sup>13</sup>Na' yesə'əzi'e castigw por ni che de'en choso'oči' choso'osaque'e beṇə'. Bitō chso'one' žin, con chse'ej chsa'oteze' bi chse'enene' do ža do yel. Na' catə' che'ej chaole txen chso'elažə'əzeche' chse'ej chsa'oxate' lgua'a žjəsyə'əzalaze'e bi zejen de'en bnežjw cuin Cristən' por ni checho catə' beṇə' gwso'ote'ene'. De'e na'anə' gwxaquə'əlebəga'aque' ca to manch lao lachə' xi'ilaza' na' ca to yiž xen lao cuerpən'.

<sup>14</sup>Na' con chesə'əzelažə'əzeche' notə'ətezə nō'olə chesə'əle'line', nitə'ətezə nite'e chso'one' de'e malən', na' chəsə'əgo'oyele'e beṇə' ca' chsa'ac sayechə šayen len xtižə' Diozən' par chso'one' de'e malən' txen len lega'aque'. Beṇə' mal ca' bazjəyo'olaogüe' chesə'əzelažə'e bi de che beṇə'. Diozən' babžie' bia' yesə'əbiayi'e. <sup>15</sup>Beṇə' goxoayag ca' bagosə'əbejyichje' nez de'en naquə

de'e güen, na' bazjəyo'e nez malən'. Chso'one' can' ben de'e profet Balaam xi'in de'e Beor. Lechgualę bebei Balaannə' gan de'en gwxi'e por de'e malən' bene'. <sup>16</sup>Pero na' ben Diozən' par ničh to bia yixə' bian' cui chac neb gwdiłəb le' che de'e malən' chone'. Borr che'enə' bšillemb le' len xne che beṇə', na' bžomb gon Balaannə' de'e malən' chene'ene' por ni che xbab clelən' de'en yo'o yichjla'aždaogüe'enə'.

<sup>17</sup>Beṇə' ca' choso'osed choso'olo'i dižə' güenlažə'ən gwxaquə'əlebəga'aque' ca bej de'en cui bi nis žia na' gwxaquə'əlebəga'aque' ca bejw biž de'en nžiguə' to be' gual chedə' cui zjəzaque'e. Babžia Diozən' bia' yesə'əbiayi'e zejlicane lo'o yech gabil gan' lechgualę naquə žchol. <sup>18</sup>Zižjo chso'e dižə' güenlažə' chso'elao' cuinga'aque'. Na' de'en chso'one' yelə' zto' che cuerp chęga'aque'enə', chəsə'əgo'oyele'e beṇə' ca' ze'e gwzolao chso'onlilažə' Cristən' par leczə chso'one' yelə' zto' che cuinga'aque', la'anə'əczə beṇə' ca' ze'e besyə'əchoje' ladjo beṇə' ca' chso'on de'e malən'. <sup>19</sup>Chse'e beṇə' ca' ze'e gwzolao chso'onlilažə' Cristən': "De'e malən' bito nābia'an chio'o", pero beṇə' ca' chəsə'əna ca' nite'e xni'a de'e malən'. Na' nezecho š chzenagcho che bitə'ətezə, xni'ei nan' zocho. <sup>20</sup>Na' beṇə' ca' bagwso'ombi'e Xancho Jesocristən' na' bebeje' lega'aque' xni'a de'e mal ca' de'en chso'onən manch yichjla'aždao' notə'ətezə beṇə' cui zjənombia' Diozən'. Pero de'en babesyə'əzolaogüe' chosyo'ozenague' che de'e

malən' babesyə'ənite'e xni'einə' de'e yoblə, na' maləch chac chega'aque' n'a'a ca antslə. <sup>21</sup>Na' de'en babesyə'əzolaogüe' chosyo'ozenague' che de'e malən', nca'alə xneze žalə' cui gws'o'ombile nez de'e naquə de'e güen, cle ca gosə'əbejyichje' de'en ben Xancho Diozən' mendad goncho de'en naquən de'e güen. <sup>22</sup>Šə cuejyichjcho de'en bene' mendad goncho, goncho can' na dicho nga: "Beco'on cheyaob de'en cheyebəb, na' cošən' catə'ən babguazjchob cheyo'ob lo'o beñjon' de'e yoblə." Na' de'e li can' na dicho nga.

#### Yidə Jesocristən' de'e yoblə

**3** Beñə' bišə' dao', de'e ngan' naquən cart əgwchope de'en chzoja' le'e. Na' babzoja' cart quinga chedə' chebeile chzenagle che dižə' lin', na' che'enda' gona' par nič əžjsa'alazə'əle na' gonje xbab che de'en baboso'ozoj profet ca' beñə' ca' gwsə'e xtižə' Diozən' cana', na' de'en babsed blo'i neto' naquəto' apostol. <sup>2</sup>Diozən' gwleje' profet ca' par gwsa'aque' lažə' ne'enə' na' bosə'ozoje' che de'e ca' ze'e za'ac. Na' neto' naquəto' apostol babzejni'ito' le'e bin' non Xancho Jesocristən' mendad goncho, Jesocrist ben' babebej chio'o xni'a de'e malən'.

<sup>3</sup>Naquən de'e žialao ənezele n'a'a cuinə' yidə Xancho Jesocristən' de'e yoblə, nitə' beñə' so'onzeche' con can' chesə'əzelažə' la'ažda'omalga'aque'enə' na' so'one' borl che de'en na Diozən' gaquə. <sup>4</sup>Yesə'əne': "Ca naquə lyebe de'en ben Jesocristən' de que

yide' de'e yoblə, con gwne'enə'. Bagwsa'at de'e xaxta'ocho ca' beñə' gwsə'onlilažə' Diozən' antslə. Na' tozəczə can' chac dezd gwxcete yežlyon' xte ža neža." <sup>5</sup>Beñə' ca' chesə'əna ca', bito chse'ene'ne' so'one' xbab de que catə' gwxc yoban' na' yežlyon', con ben Diozən' mendad əsa'aquən, na' goc can' bene' mendadən'. Bchoj yežlyon' lao nisən' de'en nyechj mbi'i len na' bčhin Diozən' nisən' catə'ən bene'en. <sup>6</sup>Na' catə' goc yejw sio' juisyən' cana'an gwžiai' yoguə' bia yixə' na' beñəch nitə' lao yežlyon'. <sup>7</sup>Na' de'e ca' chle'icho le'e yoban' len yežlyon' zjənitə'ən na' ca'aczən' yesyə'əga'aən xte catə'əch əžin ža gaquə juisyən'. Cana'ach əse'eyən chedə' can' ben Diozən' mendad. Na' leczə cana'achən' choglaio Diozən' che beñə' ca' cui chso'elao' le' de que əsa'aque' castigw zejlicane.

<sup>8</sup>Pero na' le'e beñə' bišə' dao', che'enda' ənezele de'e nga, len beñəchən' žalnez chde tža na' lechguale sša chsa'aquene' tnil iz, pero caguə can' len Xancho Diozən'. <sup>9</sup>De'en cuinə' yidə Jesocristən' de'e yoblə balə beñə' chso'one' xbab cui gon Xancho Diozən' can' bene' lyebe, pero yidə Jesocristən' catə'ən əžin or che'enə'. De'en nape' yelə' chxenlažə' len yoguə' chio'o beñəch cui le'e chontie' chio'o castigw. Chene'ene' yedinjecho xtolə'əchon' na' bito chene'ene' cuiayi' notə'ətezcho.

<sup>10</sup>Na' can' cho'o beñə' bguannə' liž beñə' še'elə chzenyale'ene', leczə can' gaquə che beñə' ca' cui chso'onlilažə' Xancho Jesocristən'

catə' əžin ža yide' de'e yoblə. Nach gaquə to sšag xen la' te che yoguə' de'e ca' chle'icho le'e yoban', na' te che yežlyon' len yoguə' de'e zjəde laogüen' chedə' yoguə'ən əse'eyən, xte yesyə'ənit de'e ca' chle'icho le'e yoban'.

<sup>11</sup>Laogüe de'en nezecho yesyə'ənit yoguə' de'e ca', cheyałə' gon cuincho lažə' na' Diozən' na' sotezə socho güe'ela'ochone'.

<sup>12</sup>Na' cheyałə' cuezcho batə'əquən' əžin ža babžia Diozən' bia' yidə Jesocristən' de'e yoblə, na' goncho par yob gaquən. Nach yoguə' de'en chle'icho le'e yoban' əse'eyən na' tant yi' gual gaquən xte yesyə'əyonə'ən na' yesyə'ənitən.

<sup>13</sup>Pero na' zocho lez gaquə le'e yoban' de'e cobə na' gaquə yežlyon' de'e cobə gan' nitə' porzə beṇə' zjənaquə beṇə' güen lao Diozən', can' none' lyebe gaquə.

<sup>14</sup>De'e na'anə' beṇə' bišə' dao', laogüe de'en zocho lez gaquə yoguə' de'e ca', cheyałə' goncho xte ga zelao saquə'əcho par niçh catə'ən yidə Jesocristən' de'e yoblə bitobi manch da' chen la'ažda'ochon' na' par niçh ca' bitobi xtolə'əcho de na' chzo chbezcho binlo len Diozən'. <sup>15</sup>Na' de'en napə Xancho Diozən' yelə' chxenlažə' len chio'o beṇəçh cui le'e chontie' chio'o castigw. Chone'

ca' par niçh baltezcho yedinjecho xtolə'əchon' cui yeyejcho lao yi' gabilən'. Leczə can' babzəj beṇə' bišə'əda'ochə Pabən' le'e, chedə' Diozən' bnežjue'ene' yelə' sin'.

<sup>16</sup>Leczə ca' yoguə' cart che' ca' chso'en dižə' che de'e ca' babzoja' le'e. Na' le'e cart ca' de'en bzoj Pabən' zjəlen de'en naquə zdebə šejni'icho. Na' balə beṇə' cuinə' se'ejni'ine' bi zeje de'e ca' na' šayeçə šayen chsa'aque' len xtižə' Diozən'. Chse'ejni'ine' clelə de'en bzoje'enə' can' chso'one' len bitə'ətezəchlə Xtižə' Diozən' de'en nyojən. Na' de'en chso'one' ca' yesə'əbiayi'e.

<sup>17</sup>De'e na'anə' beṇə' bišə' dao', laogüe de'en banezele can' chso'on beṇə' ca', cheyałə' gaple cuidad par niçh cui šejle'ele dižə' güenlažə' de'en choso'osed choso'olo'i beṇə' mal ca'. Šə šejle'ele dižə' güenlažə'ənə' bitoch sole chech talenle de'en naquə de'e li. <sup>18</sup>Legüe' latjə gaquəlen Xancho Jesocristən' le'e par niçh gaquəçh yichjla'azda'olen' can' naquə yichjla'ažda'ogüe'enə' na' le'e šejəçh gombia'achle Xancho Jesocristən' ben' babebej chio'o xni'a de'e malən'. Ledoye'ela'ochə' na'a na' zejlicane. Na' ca'ašgaczən' gaquə.

De'e na'azən' de'e chzoja'. *Bed*